

առջնորդ Տ. Ներսէս վարդապետ Մելիք-Թանգեանի նոյեմբերի 6-ի թ. 841 յայտարարութեան վրայ հետեւեալ մակագրութիւնն է արել. «Պատուիրում ենք ս. Էջմիածնի ս. Սինօղին, համաձայն Ատրպատականի Հայոց թեմակալ առաջնորդի կրկնակի թախանձանաց, կարգադրել ուղարկել Մայր Աթոռի գանձարանից, Ատրպատականի առաջնորդարանի միջոցով, ամսական 30-ական ռուբլի՝ Ուրմիայի Հայոց փոխանորդ Տ. Խորէն վարդապետ Լազարեանին մի տարի ժամանակով»։ 29 նոյեմբերի, թ. 1856:

Կ. Պօլսոյ Տիկնանց Դպրոցասէր Ընկերութեան յօգուտ կրթական գործի մի հարիւր ռուբլի նուէր Վեհափառ Հայրապետի կողմից:

ՍԻՆՕԴԻ ՕՐԱԳԻՐԵՐԻՅ ՔԱՂՈՒԱԾՆԵՐ

1 նոյեմբերի, թ. 593. Սինօղը՝ Մայր Աթոռի կալուածոց կառավարչի միջնորդութեան համաձայն, որոշեց. թոյլ տալ նոյն կառավարչին Գանձասարի կալուածում զտնւոդ «Աշմանա» հողերից 400 դեսեատին վարձով տալ Շուշուայ գաւ. Քարազլուխ գիւղացիներին երկու տարի ժամանակով, տարեկան 550 ռուբ. վարձով, պարտաւորեցնելով գիւղացիներին տալ Մ. Աթոռի օգտին նաև բոլոր բերքերի ^{4/10} մասը:

1 նոյեմբ., թ. 594. Սինօղը՝ Ղարաբաղի կոնսիստորիայի միջնորդութեան համաձայն, որոշեց. թոյլ տալ նոյն կոնսիստորիային վճարել թեմի Պտկի ս. Գէորգ վանքի վանահայր Գրիգոր քհնյ. Սարգսեանին վիճակային արդիւնքից ամսական 10 ռուբլի ռոճիկ:

1 նոյեմբ., թ. 597. Սինօղը՝ լսելով Աստրախանի կոնսիստորիայի այս տարուայ սեպտեմբ. 9-ի, № 2925, յայտարարութիւնը, որոշեց. հաստատել նոյն կոնսիստորիայի որոշումը, որի համաձայն Ստաւրոպոլի նահ. Ս. Խաչ քաղաքի երեք քահանաները հերթով պէտք է հովուեն Ստաւրոպոլի շրջակայքում զտնւոդ թուրքմենսկայա, Լիտնայեա Ստաւկա և Օվոշչի վայրերի հայերին:

1 նոյեմբ., թ. 598. Սինօդը՝ համաձայն վեհափառ կաթողիկոսի պատուէրի, որոշեց. կազմել յատուկ յանձնաժողով, որին առաջադրել քննել թեմական հաստատութիւնների աշխարհական ծառայողների համար թոշակարկզ հիմնելու հարցը և եզրակացութեամբ ներկայացնել Սինօդի տնօրինութեան:

1 նոյեմբ. թ. 601. Սինօդը որոշեց. արձակել Մ. Աթ. գանձապահի պաշտօնից Ռուբէն արեղային և կարգել նոյն պաշտօնում Արտակ վարդապետին:

6 նոյեմբ., թ. 607. Սինօդը՝ համաձայն Շամախու կոնսիստորիայի միջնորդութեան, որոշեց. թոյլ տալ Բագու քաղաքի ծխականներին նորոգել ս. Աստուածածին եկեղեցին, ծախսելով ըստ ներկայացրած նախահաշուի 1800 ռուբլի:

13 նոյեմբ., թ. 619. Սինօդը՝ համաձայն վեհափառ կաթողիկոսի պատուէրի, որոշեց. Երնջակի վանքի միաբան զպիր Արշակ Դաւթեանին արձակելով Մ. Աթոռի ագարակի կառավարչի պաշտօնից, նշանակել Խոր-Վիրապի վանքի ժամանակաւոր միաբան, իսկ ագարակի կառավարութիւնը ժամանակաւորապէս յանձնել Մայր Աթոռի կառավարութեան անդամ Արիստակէս վարդապետին:

15 նոյեմբ., Սինօդը՝ համաձայն վեհափառ կաթողիկոսի հրամանի, որոշեց. Մ. Աթոռի յոբելենական «Շողակաթ» ժողովածուի տպագրութեան համար արտաքոյ նախահաշուի տալ Մ. Աթոռի տպարանի վարչութեան 514 ռուբլի ևս:

15 նոյեմբ., թ. 622. Սինօդը՝ ի նկատի ունենալով, որ Երևան քաղաքի բնակիչ Պարոյր Աթանասեանը իւր ժամանակին չի ներկայացել սարկաւազ ձեռնագրուելու և գտնւում է անյայտ բացակայութեան մէջ, որոշեց. բեկանել Սինօդի անցած 1912 թ. № 732, օրագրական վճիռը, որով թոյլ էր տուած ընդունել նրան հոգեւոր կոչման մէջ:

15 նոյեմբ., թ. 629. Սինօդը՝ ի նկատի ունենալով, որ Աղէքսանդրոպոլի գաւառի Ալիխան գիւղն ունի քհնյ. որոշեց. մերժել Երևանի կոնսիստորիայի միջնորդութիւնը

Թումարտաշ գիւղացի Վարոս Տէր-Յովհաննիսեանին նոյն գիւղի վերայ քհնյ. ձեռնադրելու վերաբերմամբ և պատուիրել կոնսիստորիային խիստ միջոցներով հարկադրել եղիշէ քհնյ. Տէր-Աւագեանին մշտապէս բնակուել յիշեալ գիւղում և հովուել իւր հօտը:

20 նոյեմբ., թ. 636 Սինօդը՝ Վրաստանի թեմի առաջնորդի միջնորդութեան համաձայն, որոշեց, Վեհափառ Հայրապետի բարեհաճութեամբ Վրաստանի թեմի Թէլէթ և Բոլնիս ուխտատեղիների արդիւնքի միայն մի մասը իսկ միւս ուխտատեղիների ամբողջ արդիւնքը ժամանակաւորապէս դնել թեմի առաջնորդի տրամադրութեան տակ՝ թեմական տեսչին ռոճիկ հայթ հայթ ելու համար:

20 նոյեմբ., թ. 639. Սինօդը՝ քննութեան առնելով ներսիսեան Հոգ. Դպրանոցի 1913/14 ուս. տ. նախահաշիւը, որոշեց, հաստատել ներկայացրած նախահաշիւը և ուղարկելով Դպրանոցի Հոգաբարձութեան ի գործադրութիւն, պատուիրել նրան դպրոցի տարեկան եկամտից առնուազն 50% յետ դնել լրացնելու այն յատուկ և անձեռնմխելի գումարը, որ ծախսուել է վերջին տասնամեակում մի շարք աննպաստ հանգամանքների պատճառով:

25 նոյեմբ., թ. 641. Սինօդը՝ Վրաստանի թեմի առաջնորդի միջնորդութեան համաձայն, որոշեց, Վեհափառ Կաթողիկոսի պատուէրի համաձայն արձակել Խոր-Վիրապի վանքի միաբանութիւնից Գեղամ վարդապետ Բաբաջանեանին և թոյլ տալ Վրաստանի թեմի առաջնորդին կարգել նրան Լոռու վիճակի «Յովհան Օձնեցու» ուխտատեղու վերահսկող:

25 նոյեմբ., թ. 644. Սինօդը՝ լսելով Վրաստանի թեմի առաջնորդի այս տարուայ նոյեմբ. 21-ի յայտարարութիւնը՝ «Մարց» կալուածում կառավարչի օգնական Բադալ Խարատեանի չարագործների ձեռքով սպանուելու մասին, որոշեց, պատուիրել Վրաստանի թեմի առաջնորդին տալ սպանուած անտառապահի ընտանիքին կալուածի եկամուտներից միանուագ նպաստ հարիւր ռուբլի: